

SEGUNDA CARTA DEL APOSTOL SAN PEDRO

Pedro ucheë mbesa mondo Jesús quiato je

1 ¹Simón Pedro chõ se re. Jesucristo rimba chõ se re. Jesucristo chĩmbaaquiato chõ se re. Aico co mbesa mbesa jẽje co. Ure rã si chõ jẽingo nguiã Jesucristo icua ùquĩ. Nandebi tuchi Jesucristo icua mose. Dios turã tuchi nandemingo mose Jesucristo rese. ²Sã Dios turã ndiqui tuchi jendese. Sã Dios jembia tuchi mingo. Jesucristo jẽicua i i tuchi bei oso quia.

Jeñĩmbaaquiato i i tuchi Dios riĩ

³Jesucristo nandeicuate quia ã. Nyebe Dios riqui nguiã mbae raã ja tuchi nande je co. Nandemingo bei sacua. Nandeico sacua erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴Dios que ucheë turã mee nande je ra: —Co tasaã jẽje. Å tasaã jẽje. Co abe, i tuchi que equia nande je ra. Ûquĩ ngue esaã ja nande je cote ra. Jesucristo rã si que nanderaã nda. Ae mbae icua mbia chosei chosei quia nae, ùquĩ si eriqui nanderiquisã quisã co. ⁵Jẽingo Dios icuate ùquĩ. Jẽingo turã ño nguia jẽ. Jeñĩmbaaquiato i i tuchi quiato quia Dios riĩ jẽ. ⁶Jendeco jẽingo turã ño nguia i co jẽ. Jẽingo mingue chõ nguia jẽ. Dios rã si chõ jẽingo jẽ. ⁷Jẽingo turã ño nguia jenyue. Jenyesequa chõ nguia jenyiese no. ⁸Eĩ jenyee mose, eturãte ùquĩ. Eĩ jenyee i i tuchi chõ nguia jẽ. Ûquĩ mose ra Jesucristo jẽicua chooño eã. Mbae ra jesaã saã tuchi quia ee. ⁹Eĩ jenyee eã mose, mbia resayã na ño jẽingo nguiã ùquĩ. Eĩ jenyee eã mose, jẽtesarei chõ ndei equia jeñia irei ji si ùquĩ. Jesús jẽicua cose ndare mbutiã mose. ¹⁰Ûquĩ jesaã saã tuchi chõ nguia jẽ. Jẽ ùquĩ naa mose, jẽ sí chõ nda jenyiicua quia. “Dios chiirabo chõ nande re”, jenyee tuchi ra equia. Jẽhui eã mbei ra equia Dios si cote. ¹¹Dios ra jẽisi tuchi mingo Jesús récuua cote. Huee ra jẽingo bei erese.

¹²Nyebe ra aico bei jemundua ndua ùquĩ ndese. Jẽicuate raque. Jẽingo turãte raque Dios cheë ndese. ¹³Coche aico rei jemundua ndua ùquĩ ndese

a. Sereco siqui mose a ra aïco jemundua ndua bei ùquĩ ndese. ¹⁴Jesucristo que ñee seje ra: —Ereico arete eã nda íbii, i que sembiirandu ra. ¹⁵Taemundua ndua bei erese. Ì nda jêtesareiã mbei esi semanonde abe.

Se sí amae Jesucristo rese, i Pedro

¹⁶Jesucristo quirãcuã ngue uresenei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùquĩ nde. Mbia ñee ñooño je eã tuchi chõ ùquĩ nde. Se sí chõ ngue amae Jesucristo nininya rese ra. ¹⁷⁻¹⁸Dios que unininya mee ee sita íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriiri ño co re. Sechesequa chõ co re. Seyate erese, i que Ibatenda ñee aque mose ra. Echeẽ ngue achandu se abe ra. ¹⁹Eĩ sí tuchi que Dios cheẽ mbuchecuasa chimbesa nyii ra. Echeẽ mbesa ji chooño eã ño ùquĩ nde. Jẽingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru resaete nyaashĩ nyee no. Jẽingo tuchi mose echeẽ mbesa ji rese, Cristo ra jendique tesae tuchi quia jêje. Sã nyasitata riqui nanderesae no. ²⁰⁻²¹Dios cheẽ mbuchecuasa mo ngue ñee ñooño eãte quia emo mose ra. Ucheẽ ae que embesa mbesa eãte quia ra. Espiritu Turã ño ngue embucheẽ nguia ra. Espiritu Turã ño ngue Dios cheẽ mbesa mbesa quia quia ee ra.

Ae mbia mbiirĩ irĩ nguia embaaquiату quiату mose

2 ¹Mbia mo ngue Dios cheẽ mbuchecuasa saã ñooñote quia cose ra. Espiritu Turã ae que embucheẽ eã nda. Eĩ sí ra emo jembiiirĩ irĩ ñooño name. Ñee ñooño nda equia Dios riĩ jêje. Hui huite chõ nda equia Jesucristo si. Ae mano nguia eriĩ. Nyebe ra Dios ùquĩ mbutiã asi. ²Mbia ra siqui tuchi mbae icuã ndese ùquĩ ñee nguire. Mbia ra siqui chooño ño cuña mo ndese ùquĩ ñee nguire. Nyebe ra mbia ñee icuã icuã Jesús cheẽ turã nii. ³Ûquĩ nda mbae isiquia choosei osei tuchi chõ nguia jembae. Nyebe ra jembaaquiату icuã icuã. Dios que ñee ùquĩ nii coose ra. —Ûquĩ nda ambasi tuchi je, i que ra. Achite ùquĩ ñi a cote.

⁴Angeles mbae icuã naa mose, ùquĩ nyee que Dios tiisu isu áte quia ra. Ecua ji que emombo tata cuásuu ra. Itondáruu que emombo ra. Siqui bei sacuã huee, Jesús tu chee mae eicuã ndese. ⁵Mbia cose ndare abe que Dios tiisu isu áte quia ra. Noé mosenda. Ûquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasu mbia iquia ja sacuã. Noé mii ngue Dios iquia eã nda. Mbia siete rese. Dios cheẽ nenei neneisate quiату ngue Noé nde. ⁶Sodoma jenda abe que Dios tiisu isu áte quia ra. Gomorra jenda abe no. Mbia icuã tuchite quiату ngue re. Nyebe Dios ùquĩ ndei ja nguiã tata je. Echuchua ja resebe. —Eĩchĩ nda nande abe je re, nandeico eã mose erese, i sacuã mbia icuã. ⁷Lot mii ngue Dios iquia eã nda. Eturãte quiату ngue eriqui nguiã Dios je.

Eya eãte que eriqui mbia hue jenda mbae icuã naa naa mose ra. ⁸Mbia mbae icuã naa naa mbei mose que Lot ia eã mbeite riqui ra. Ae mii ño ngue echiã turã Dios je ra. Nyebe Dios ae mii iquia eã nguiã. ⁹Ae siqui beite quia Dios rese nae, Dios riqui ũquĩ ndequiatu beite co. Mbae icuã jea je esi tã i mose ee. Ae mbae icuã saã nguia nae, ũquĩ nda Dios mbasi tuchi. Jesucristo ra tu chee mae eicuã ndese. ¹⁰Ae siqui quia mbae icuã ndese ubi nae, ũquĩ nda Dios mbasi tuchi. Ae aba cheẽ mumba quia, ũquĩ abe ra Dios mbasi no. Ae eĩ ñooñote quia mbia je nae, ũquĩ. Ae ñee ñooñote quia mbae ibatenda je nae, ũquĩ abe no. ¹¹Mbae ibatenda riĩ ngue ángeles ñee icuã eãte quia Dios je ra. Angeles quirãcuãte raque mbia si. ¹²Á mbia quiarei mbae quiaa riinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa riinda rã ño nda ã mano cote. Dios ra eiquia tuchi. ¹³Á nda mbae rasi saã tuchi quia cote. Ubi icuã mii ndese chõ eriqui nguiã ndua ã. Jembĩĩrĩ irĩ ño nguiã ã. Quiaru chooño ño nguiã jendese ã. Jesús quiato raã ñooño jėje. Aba ireingua tuchi chõ ũquĩ nde. ¹⁴Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae oseĩ oseĩ jate equia ã. Dios ra embasi tuchi cote. ¹⁵Ishote eriqui Dios si ã. Nyĩicuasẽ equia Dios si ã. Sã Balaam ndiqui nyĩicuasẽte esi no. Beor riĩrĩ. Sã mbae icuã naa mbae isiquia isi nonde no jē. ¹⁶Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷Icua iru rã ño ã mbia re. Sã quirĩriã ndiqui ibeishĩ mbucuatate no. Eĩ si chõ ã mbia re. Hue bei eã chĩ. Nyebe ra Dios emombo bei itondáruu. ¹⁸Uchisaã mbae icuã nii ñee ñee ja mbia je. Ucuasu raã naate equia ã. Mbia mbiĩrĩ irĩ mbeite equia mbae icuã je ã. Ae hui ramo ndei mbae icuã si nae, ũquĩ abe mbiĩrĩ irĩte equia mbae icuã je ã. ¹⁹—Jēingo mose urerese, jēingo turã ndae, i bei rei equia mbia je ã. Mbae icuã nimba sí chõ ñee ñee nguiã ee ũquĩ. Ae rui nandeico quia nae, ũquĩ nimba quiatu nande re. ²⁰Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embĩĩrĩ irĩ mose ũquinde, eicuã tuchi ra cote. Mbae icuã nimba tuchi ra ae cote. Ñiinda si. ²¹Dios quia nda ũquĩ icuayã mbei nyii re chã. Dios icuare quiatu ngue hui nguiã echeẽ si. ²²Siqui mbiĩrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu socio mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

Jesucristo ra tube

3 ¹A aico segunda carta mbesa jėje a. Jemundua turã sacuã ño ũquĩ nde. Ae acheẽ jėje nyii nae, ũquĩ ndese jemundua sacuã ño

aico nguiã ã mbesa jêje a. ²Ae Dios quiato senei senei mbia je nyii nae, ùquĩ ndese jendua. Ae Jesús chimbaaquiato ñee mbia je nae, ùquĩ ñee jemumbayã ño. ³Ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ùquĩ achõ ndese chõ nda eriqui. ⁴Ûquĩ nda ñee jêje: —Sã Jesús tu ãte no jê. Sã ucheẽ mbuchebi chõ jê. Sã eĩ mbei chõ Dios chisaã ima jê, i ra ùquĩ ñee icuã icuã jêje. ⁵Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶Aquere que Dios ama mbicuasua ra. Mbae iquia ja nonde cote. ⁷Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aquere mose ra mbia Jesús quiatoã oquei ja.

⁸Co abe rese jendua, Seresenda: Nyaashĩ miĩ na ño mil años Dios je re. Mil años na ño nyaashĩ miĩ Dios je no nde. ⁹—Jesús ra tu ãte rei no. Ucheẽ embuchebi rei quia mambi, i raque emo emo nguiã Jesús riĩ ã. Ico mingüete equia mbia je pe. —Emo nda quiachãya Dios si chã. Siqui ja nda erese chã, i equia eriiisu isu pe no. Nyebe eriqui nguiã tu jei eãte. ¹⁰Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. Ûquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquei tuchi. Mbae ja ra oquei ibi jenda.

¹¹Nyebe Dios nandesiiichã tuchi quiato quia. Dios rã si quiato nandeico mbae turã ndese. ¹²Jesucristo ru jenyosei quiato quia. Ae Dios bite nae, ùquĩ ndese quiato jëingo. Ì nda Jesucristo ru jei. Ûquĩ mose ra ibei oquei ja. Nyasitata abe ra membe tata je. ¹³Aquere ra Dios ibei mbiasu cote. Ibi abe ra embiasu ucheẽ nguire no. Ûquĩ ño nandesaarõ arõ nguiã ã. Ûquĩ mose ra mbae turã achõ cote.

¹⁴Nyebe jëingo turã ño Dios rese. Mbae icuã je ra jeñimbiicuachĩ jê. Jeñimbiicuã eã mose ra Dios iate jendese eru mose chã. ¹⁵Dios siqui mingüete quia mbia je co. Mbia rirõ sacua eicuã si chõ ùquĩ nde. Eĩ si chõ ngue Pablo abe embesa nguiã jêje no. Ae Dios ñee Pablo je nae, ùquĩ sí que Pablo mbesa jêje ra. Nanderesenda tuchi chõ Pablo re. Nandehesecua chõ nguiã erese ã. ¹⁶Pablo carta mbesa mbesa bei mose, mbia mundua ndua sacua ã ndese chõ ñene. Aba chiicuayãte raque Pablo chimbese emo emo. Ae eaquiataate Dios rese nae, ùquĩ Pablo cheẽ nyabi chabi chõ nguiã. Sã embesa ji ataque abi abi no. Nyebe ùquĩ sí chõ ñimbiicuã icuã nguiã ùquĩ. ¹⁷Sechesecua, a aico jembiiirandu jei a. Mbia icuã jembui eã sacua Dios si. Mbia icuã nda jembiiĩ irĩchĩ jê. Jëingoquiato tuchi quiato jê. Huee jëingo turãte Dios rese namo hue. ¹⁸Jesucristo rei nandererecua tuchi. Jëicua i i tuchi quiato jê. Jenyesecua i i tuchi quiato erese jê. Ae que nanderirõ mbae icuã si ra. Eaturã mbeite que eriqui nande je ra. Sã mbia ñee turã mbei quia eriĩ. Amén.